

**Ruth Schmitt**  
**Die Liebe uffem Land in friehere Zeite**

In friehere Zeite uffem Land,  
do hatte mer e altmodisch Denke:  
Sich ze veliebe, war riskant.  
Soi Herz konnt mer net so aafach veschenke!

Do musst mer gucke, daß es basst:  
des Vemöge stand ganz hoch im Kurs.  
Alles annere is do degeje veblasst.  
*Sach* musst mer hunn - das war kaan Stuss!

Die Uffassung war so uffem Land,  
die Scholle hatte e groß Gewicht.  
War aaner arm odder abgebrannt,  
do nutzte ihm aach kaa schee Gesicht.

Moi Geschicht passierte vor ganz langer Zeit  
in wohlhabende Bauerschleitkreise.  
Mit ganz veel Herz unn Hartnäckigkeit  
will se uns des Gejedaal bewaise!

Des Gretche - jung, uffgeschloss unn wach -  
das war im Ort begehrt.  
Kaa Wunner - „die erbt emol ganz veel *Sach!*“ -  
jeden Freier hatt se bis jetzt abgewehrt.

Mit kaam aane Borsch ausem Ort wollt se gehe,  
die ware all net no ehrm Sinn.  
Sie hört' uff ehr Herz - mer kann's jo vestehe:  
ohne Lieb war bei ehr nix drin.

De Vadder flehte: „Das is unser Vederbe!  
Gretche“, so sprach er vunn Spät bis Friehe,  
„du werscht noch als alt Jungfer sterbe!  
Nemm doch de Kunrad, der is e gut Partie.“

Doch dem soi Äcker konnte des Gretche net locke.  
De Kunrad war jo schon ganz veknittert,  
hatte immer riesige Löcher in de Socke,  
war aach veel älter unn total vewittert.

De Vorschlag vum Vadder war dem Gretche vehasst.  
Wie konnte der nor so grundhungrig denke?  
Sie hatt en ganz annere ins Auge gefasst -  
**dem** wollte sie ehr Herzje schenke!

Vun auswärts aaner hatte im Ort sich vedingt,  
en gradgewachsene, starke Typ,  
dem alles, was er aapackt, gelingt -  
der war dem Gretche recht unn lieb.

Oft is se dorch des Ort getänzelt,  
hot noh ehre Traummann Ausguck gehall.  
Er hieß Fritz - um den is se erumgeschwänzelt.  
Des Gretche hot dem aach sehr gut gefall...

Es is ihm im Hern erumgespukt:  
So e Mädchen wär soi ganz groß Glick!  
Sie hot sich die Aage ausem Kopp geguckt,  
um ze erhasche soine veliebte Blick.

An dem Borsch war alles echt,  
er war wie gemacht for des Gretche!  
War schaffig, sparsam, hot nie veel gezecht  
unn guckte noh kaam annere Mädchen.

Wochelang hunn se es fertiggebracht,  
hunn geschäkert unn poussiert.  
Des Gretche hot jetzt aafach Nägel mit Köpp gemacht,  
de Fritz an eme scheene Owend vefiehrt.

Das is natürlich uffgefall,  
des Techtelmechtel vun dene zwaa.  
Mer hot es net for sich behall,  
prompt dem Vadder zugetraa.

Der tobte erum in ganz großer Wut:  
„Schlaa der den Kerl bloß ausem Sinn!  
Aaner, der gar nix mitbringe dut,  
der kimmt mer net in des Bajes erinn!“

Des Gretche ließ de Vadder schänne -  
ihr Entschluss stand felsefest.  
„Loss se doch gehe“ tat die Modder flenne,  
„sei froh, daß se uns Alte net velässt.“

Uff kaan Fall ließ des Gretche locker,  
machte dem Fritz an jedem Dag Mut.  
Er war for se Honig, süß wie Zocker,  
wie Feier brannte er ihr im Blut.

Sie trafe sich immer hinner de alt Scheier,  
um ehr Liebschaft dann ze lebe.  
Des Gretche war ihm lieb unn deier,  
die zwaa tate im siebte Himmel schwebe.

So Geschichte kame aach domols vor.  
Mer fragte net noh de Leit, noh de Welt...  
Wie des Lewe so speelt, noh knapp eme Johr  
hot mer de Vadder uff e hart Prob gestellt:

„Großvadder werschte!“ seet die Gret,  
„kumm jetzt endlich zu Vestand!“  
Soi Herz wurde waich, de Zorn war veweht,  
sagte Ja unn Amen, gab dem Fritz die Hand.

De Fritz schaffte tagsüwwer uffem Feld,  
war aach owends net so mied;  
mit dem Nachwuchs war es gut bestellt:  
fünf Kinner hunn se noenanner kriet!

Die Wahl vum Gretche war net schlecht:  
de Fritz hielt alles gut in Schuss.  
Er war fleißig, patent unn aach gerecht.  
Es gab also doch noch e *Happy end* am Schluss!

Aans die Geschicht uns alle lehrt:  
en tüchtige Mensch is immer richtig!  
Sach zu hunn is aach net vekehrt,  
awwer net so aarich wichtig...